

160 ta qaror haqiqiy emas...mi?!

SESSIYA
KUN
TARTIBIDA

Viloyat hokimligi majlislar zalida Xalq deputatlari viloyat Kengashining qirq beshinchi sessiyasi bo'lib o'tdi. O'zbekiston Respublikasi Oliy Majlisi Senati a'zolari, Xalq deputatlari viloyat Kengashiga saylangan deputatlar, davlat va jamoat tashkilotlari hamda OAV vakillari ishtirok etgan sessiyani Xalq deputatlari viloyat Kengashi raisi o'rinbosari Abduraim Choriyev boshqarib bordi.



S. Hamidova va Tibbiy ijtimoiy xizmatlarni rivojlantirish boshqarmasi boshlig'i X. Mamarajabovlarning ma'ruzalari tinglandi hamda muhokama qilindi. Shuningdek, viloyat Xalq ta'limi boshqarmasi boshlig'i S. Hamidova viloyatda xalq ta'limi tizimini tubdan isloh qilish bo'yicha yillik hududiy dasturni tasdiqlash to'g'risidagi masala yuzasidan ham axborot berdi. Surxondaryo viloyati ma'muriy sudlari tomonidan o'tgan yili mahalliy davlat hokimiyati organlari tomonidan qabul qilingan 762 ta qarorning 160 tasi haqiqiy emas deb topish bilan bog'liq masala yuzasidan viloyat ma'muriy sudi raisi R. G'ulomovning hisoboti tinglandi va muhokama qilindi. Sessiyada Prezidentimizning 2020-yil 24-noyabrda "Sud hujjatlari va boshqa organlar hujjatlarini ijro etish tizimini yanada

takomillashtirish chora-tadbirlari to'g'risida"gi farmonining viloyatda ijro etilishi yuzasidan Majburiy ijro byurosi viloyat boshqarmasi boshlig'i A. Xudoyorovning hisoboti eshitildi. Shuningdek, sessiyada Boysun, Denov, Sho'rchi tumanlarida ekspluatatsiya muddatini o'tab bo'lgan va ma'nau eskirgan ko'p kvartirali uy-joylarni buzib qayta qurishga ruxsat berish to'g'risida Xalq deputatlari viloyat Kengashining sanoat, transport, qurilish, kommunal soha va aholiga xizmat ko'rsatish masalalari bo'yicha doimiy komissiyasi hamda Kengashning yoshlar siyosati, xotin-qizlar va gender tenglik masalalari bo'yicha doimiy komissiyaning "Ayollar daftari"ga kiritilgan xotin-qizlarni qo'llab-quvvatlashga doir masalalari ko'rib chiqildi. Qizg'in bahs-munozaralar asosida o'tgan sessiya kun tartibidan o'rinalgan masalalar yuzasidan tegishli qarorlar qabul qilindi.

Usmonali NORMATOV,
Naimullo MUHIBULLOYEV
(surat)

Qariyb qirq foiz qoldi

Bunyodkorlik

Boysun tumanidagi "Ko'lqamish" mahallasida 90 o'rinli, Angor tumanining "Novshahar" mahallasida 120 o'rinli davlat maktabgacha ta'lim tashkiloti foydalanishga topshirildi.

Ta'lim tashkilotlarining ochilishiga bag'ishlangan tadbirda viloyat maktabgacha ta'lim boshqarmasi boshlig'i, tuman hokimlari, sektor rahbarlari, davlat va jamoat tashkilotlari vakillari, nuroniyalar va ota-onalar ishtirok etishdi. Boysun tumanidagi "Ko'lqamish" mahallasida sendvich panelli yangi 90 o'ringa mo'ljallangan bog'chaning qurilishi uchun 1 milliard 150 million so'm mablag' sarflandi hamda 20 nafar mahalliy aholi vakillari ishga qabul qilindi. Ta'kidlash joizki, 2018-yilda tumanda o'nta davlat maktabgacha ta'lim tashkilotlarida bog'cha yoshidagi bolalarning

7,6 foizi qamrab olingan bo'lsa, bugungi kunga kelib tumanda faoliyat olib borayotgan 92 ta maktabgacha ta'lim tashkilotlarida 3-7 yoshgacha bo'lgan 11 032 nafar bolalarning 7 426 nafari, ya'ni 62,7 foizi qamrab olingan. Qamrov oshgani sari sifatli xizmat talabi ham oshadi. Angor tumanidagi "Novshahar" mahallasida 1978-yilda qurilgan 50 o'rinli bolalar bog'chasi ham ma'lum sabablar bilan 2005-yilda o'z faoliyatini to'xtatgan edi. Yillar davomida bino yaroqsiz holda, tashlandiq qiyofaga keldi. Respublika byudjetidan 3 milliard 264 million so'm mablag' ajratilib, mazkur bino qayta

qurildi va zamonaviy ko'rinishga keltirildi. Davlat maktabgacha tashkilotida to'rtta uzaytirilgan guruhga 120 nafar, ikkita qisqa muddatli majburiy tayyorlov guruhlariga 60 nafar, jami 180 nafar bolalar qamrab olindi hamda 25 nafar mutaxassis ishga qabul qilindi. Tumanda so'nggi besh yilda

maktabgacha ta'lim tashkilotlarining soni 14 tadan 160 taga, qamrov esa 1 810 nafardan (13,9%) 8 282 nafarga (70,3%) yetkazildi.



Viloyatda 3-7 yoshgacha bo'lgan bolalarni maktabgacha ta'lim tashkilotlariga qamrab olish bo'yicha ishlar tizimli ravishda davom ettirilmoqda. Eslatib o'tamiz, joriy yilning 16-fevral kuni viloyat hokimi To'ra Bobolov tomonidan Hokimlik soati yig'ilishida viloyatda xalq ta'limi va maktabgacha ta'lim tizimini tanqidiy muhokama qilingan edi.

Viloyat hokimligi
Axborot xizmati

SEKTORLAR FAOLIYATI

IKKI MAHALLADA...

Bugun aholi bilan manzilli ishlash har qachongidan dolzarb. Sababi koronavirus pandemiyasi har bir insonni moddiy va ma'naviy jihatdan sinovdan o'tkazmoqda. Bunday paytda fuqarolarni nafaqat iqtisodiy qo'llab-quvvatlash, balki ularga ruhan madad berish ham nihoyatda muhim.

Davlatimiz rahbari tashabbusi bilan "Temir", "Yoshlar" va "Ayollar" daftarinin hayotga tatbiq etilishi ana shu ezgu maqsadni amalga oshirish imkoniyatini beryapti, deyish mumkin. Zero, shu asosda sektorlarga bo'lingan holda ro'yxatda turgan ishsiz, ijtimoiy himoyaga muhtoj aholi qatlamining bandligini ta'minlash bo'yicha aniq amaliy ishlar olib borilayotir.

Termiz shahri prokurori, ikkinchi sektor rahbari X. Mamatqulov tomonidan sektor hududidagi mahallalarda muntazam aholi bilan uchrashuv va sayyor qabullar tashkil etilmoqda. Bu esa aholining tizimga bo'lgan ishonchini oshirayotir. Misol uchun, Termiz shahridagi "Shifokor", "Temiryo'lchi" mahallalarida bo'lib o'tgan

uchrashuvlar shunisi bilan ahamiyatliki, qabullarda yoshlar faol. Yoshlarning muammo va takliflarini tinglayotgan sektor rahbari murojaatlarni ko'rib chiqishda ham o'ziga xos yechimni qo'llayotir. "Shifokor" mahallasida istiqomat qilayotgan 28 nafar yoshning muammolari o'rganilib, ularning yechimi bo'yicha tegishli choralar ko'rildi. Shuningdek, eng og'ir hudud sifatida tanlab olingan "Temiryo'lchi" mahallasida esa Sektor rahbari tashabbusi bilan tibbiy ko'rik tashkil etildi. Unda 96 nafar mahalla fuqarosi o'z sog'liklarini tekshiruvdan o'tkazishdi. Turli kasalliklar aniqlangan 23 nafar fuqaroning davolanishi uchun yo'llanmalar berildi.

Dinara QO'ZIMURODOVA



